

## La detga dalla zetga da Halloween

Ina sera avon Numnasontga seseva in fravi cul num Jack en in'ustria. El era in dètg ranver, nauschs e savens eivers, cunquei ch'el era in hazer bueder. Tuttenina ei il giavel cumparius ed ha vuliu prender Jack cun el giu en siu reginavel. Lez ei secapescha buca propi staus incantaus da quei ed ha fatg amogna si'olma al naucli, sch'el astgi aunc beiber in davos sitg. Cunquei che Jack aveva negins daners danvonz pli, ha el supplicau il giavel da segidar. Il da cornas ha schau surplidar da semidar en ina muneida per saver pagar il quen agl ustier. Sin quei aveva Jack mo spitgau. El ha buca studegiau ditg, ha mess la muneida en sia buorsa ed ha serrau quella. E perquei che la buorsa veva si ina crusch, eis ei buca reussiu al giavel da sedeliberar. Il fravi sfarfatg ha marcadau cul giavel ed ha detg ch'el laschi mo liber el, sch'el spetgi aunc diesch onns avon che vegnir per si'olma. Al naucli eis ei restau nuot auter che d'acceptar quella proposta per puspei vegnir libers e saver ir per siu fatg.

Diesch onns pli tard, ei era puspei la sera avon Numnasontga, ei il giavel returnaus per finalmein saver prender Jack cun el. Mo era quella ga ha Jack supplicau il dalla cassacca verda d'ademplir in davos giavisch: El vegli aunc magliar in meil sco davosa tschavera. E schegie ch'il huz era avertius che Jack fuva empau in cugliun, ha el vuliu consentir quei davos giavisch ed ei revius sin in maler. Jack ha immediat priu neuado il cunti da sac ed ha entagliau ina crusch sil best dalla plonta. Il pauper gianter era danovamein pigliaus! Per puspei vegnir libers eis ei restau nuot auter ad el che da far amogna aunc inagada ina prolungaziun da diesch onns. Jack denton era vegnius empau garmadis ed ha pretendiu ch'il giavel laschi en ruaus el per adina. Tgei ha il naucli vuliu far, el ha stuiu empermetter quei al fravi.

Cura che Jack ei lu tuttina morts muort vegliadetgna enzacons onns pli tard, ha el buca astgau entrar enta parvis, perquei ch'el era staus si'entira veta in maluardau ranver, fauls ed eivers. Ins ha tarmess el giu gl'uffiern. Il giavel aveva nuota emblidau Jack. Cunquei ch'el aveva denton giu empermess da schar en ruaus en perpeten l'olma dil fravi, ha il giavel era renviau Jack digl uffiern e tarmess anavos el danunder ch'el era vegnius.

Perquei ch'ei era aschi stgir ha il dalla cassacca verda aunc dau in cotgel ardent per muossavia. Per ch'il cotgel stezzi buc ha Jack mess quel en ina rava cavada ora. Ed aschia ha el stuiu vagabundar en perpeten per la tiara entuorn, mo cun sia latiarna sco muossavia.